

INUIT ATAQATIGIIT

INATSISARTUNI



2. august 2011

UKA 2011/50

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Inatsisartut Aatsitassat pillugit inatsisaat nr. 7, 7. december 2009-meersoq aammalu suliat tassunga tunngatillugu suliarineqartut pillugit, siunertaralugu siunissami misissueqqissaarnernut akuersissutinullu tunngatillugu Inatsisartut tusarniaaffigineqarnermikkut akuutinneqartalernissaat pillugu apeqquteqaat aallaavigalugu oqallinnissamik siunnersuut.

(Inatsisartuni ilaasortat Naaja Nathanielsen aamma Juliane Henningsen, Inuit Ataqatigiit)

Tunngavilersuut

Aatsitassat pillugit oqartussaaffiup danskit naalagaaffianiit nunatsinnut nuuneqarnera aalajangerneq eqqortuliorneruinnarani pingaaruteqarluartuuvoq.

Taamanikkut aalajangiisarneq Kalaallit Nunaani Danmark-imilu oqartussanit ataatsimoorullugu tigummineqarallarami, ataatsimoorussamik ataatsimiititaliaqarsimavoq – Kalaallit Nunaanni aatsitassat pillugit ataatsimoorussamik ataatsimiititaliaq. Ataatsimiititaliaq taanna kalaallinit inatsisartuni ilaasortanit taamatullu Folketing-imi ilaasortanit inuttalersorneqarsimavoq. Taakkua aatsitassat pillugit ineriartorneq malinnaavigalugulu qallunaat kalaallit nutaatalu naalakkersuisunut, ilaatigut misissueqqaarnissat piiasoqarsinnaanerillu pillugit inassuteqartarlutik. Suliassat immikkut pisariunngitsutut isigineqartut, ataatsimiinnerit akornanni siulittaasuusunit suliarineqarsinnaasarsimapput.

Oqartussaaffik tamanna Namminersorlutik Oqartussanut tunniunneqarmat, ataatsimoorullugu ataatsimiititaliaq aamma atorunnaarsinneqarpoq. Tamatuma kingorna Naalakkersuisut kisimiillutik Aatsitassat pillugit aalajangiisarnerit tigummisarilerpaat. Naalakkersuisut pisussaaffeqanngillat Inatsisartut apeqqutini Ataatsimoorussamik ataatsimiititaliap tamakkununga tunngasuni oqaluuserisarsimasaanik oqaluuserinnittissallutik. Taamaattorli Naalakkersuisut pisussaaffeqarput ukiumoortumik Inatsisartunut misissueqqaarnissamut, piaanissamut akuersissutaasimasut taamatullu pilersaarutigineqartut pillugit nalunaarusiornissaminnik.

Tamatut oqallisissiaq tunngavigalugu siunnersuuteqarnitsigut siunertaarput paasiniassallugu, ilumut Inatsisartunit kissaatigineqarnerasoq taamatut qinikkat amerlanerusunik tunuliaqutallit misissueqqissarnissat piaanissamullu akuersissutit nalilersueqataasarnissaannut. Isumagisassaq manna ataatsimiititaliami tassunga oqartussaassuseqartumi assersuutigalugu inissinneqarsinnaavoq. Taamaakkaluartorli apeqqutit arlallit nalilersuiffigilluaqqaarneqartariaqarput. Ataatsimoorussamik ataatsimiititaliatulli ilusilerlugu aaqqiineq, immaq suliassat siviuserusumik suliarineqartalernissaanik nassataqarsinnaavoq aammalu Inatsisartut Ombudsmand-iata pisussaaffii annertusisinnaassallutik aalajangiinerit arlaatigut naamagittaalliutigineqaraangata.